

«La democrazia n'ha survegnì nagins donns»

Dapi che la pandemia dominescha il mintgadi en las medias legian ed audan ins da opiniuns divergentas, da polemicas e parolas politicas cun demonstraziuns. Po la democrazia svizra surventscher questa situaziun? – La FMR ha discurre cun Andreas Glaser, il directur dal Center per democrazia ad Aarau.

MARTIN GABRIEL/FMR

Tant ordavant: Per il professor da dretg *Andreas Glaser* è la Svizra da principi e tenor la situaziun dad oz capabla da dumagnar il conflict actual. Il medem mument renda Glaser dentant er attent al privel da las medias socialas e da smanatschas vers politichers.

FMR: *Il cusseglier federal Ueli Maurer è sa preschentà dacurt ad ina demonstraziun en in chamischut dals «Freiheitstrychler». In cusseglier federal en in costum dals critichers da la pandemia. Tge munta quai per la situaziun da nosa democrazia?*

Andreas Glaser: Sch'ins suppona che quai è stà in'aziun intenziunada, mussa quai il champ da tensiun che noss sistem guvernamental cuntegna. In champ da tensiun sco strusch in auter sistem politic sin il mund. D'ina vart ina democrazia da cumpromiss cun ina regenza collegiala da concordanza. Da l'autra vart l'integraziun d'opiniuns minoritaras en il sistem sez. Da temp en temp sa stgargian questas tensiuns, cura che members da la regenza van al cunfin da la collegialitad u schizunt in zic surora. Talas aziuns capitin da temp en temp e n'èn betg da survalitar. Ellas pon dentant esser in avvertiment u in signal d'alarm ch'il consens saja periclità. La dumonda è enfin tge punct ch'il sistem supporta talas aziuns. Il fatg che *Christoph Blocher* n'è betg vegnì reelegì sco cusseglier federal è per exempel er stà ina reacziun al fatg ch'in cusseglier federal è tenor il parlament s'allontanà memia fitg dal gremi.

En connex cun l'extensiu dal certificat obligatoric han tschertas gruppaziuns cunter l'extensiu, p.ex. la Partida populara svizra, discurre d'in reschì dictatori. Igl ha anc dà auters predicats fitg severs ed agressivs. Tge schais Vus da quai?

Sch'i sa tracta da parolas puramain politicas tutga quai fin ad in tschert grad tar il giu da pussanza. Or da la vista dal dretg constituiziunal pon ins dentant dir ch'i na dat nagins indizis che mussassan en direzziun dictatura. Il cuntrari: Las proceduras democraticas cun elecziuns, votaziuns, iniziativas e referendum sco er sessiuns da parlaments funcziunan senz'auter. Er il federalissem ha vinavant in spazi d'agir. Il sulet ch'ins pudess remartgar è che las regenzas relaschan dapli ordinaziuns ed ils parlaments fan diever da la legislaziun d'urgenza. Er quai succeda dentant a basa da la constituiziun che prevesa quests instruments per situaziuns extraordinarias.

Malgrà che la politica uffiziala da la Confederaziun e dals chantuns emprovan da giustifitgar las mesiras ed accentueschan las libertads da mintga singul e mintga singula da sa laschar vaccinar cunter il coronavirus u da sa laschar testar per daventar possessor dal certificat, protesteschan millis persunas cunter las mesiras.

Il dretg da demonstraziun è garantì er en in temp da crisa e da pandemia. El po vegnir restrenschì, dentant be en il rom da la proporzionalitad. Il Tribunal federal ha decidì dacurt che tschertas restricziuns pon schizunt violar la constituiziun. Da l'autra vart ha il Tribunal federal er decidì che las mesiras che vegnan criticadas da las demonstraziuns, sco per exempel l'obligatori da purtar mascras, èn confirmas als dretgs fundamentals en l'interess da la sanadad publica. Igl è il bun dretg da demonstrar, la politica dastga dentant era prender mesiras cunter la pandemia. Co la maioritad da las votantas e dals votants valitescha en il concret il certificat vegn a sa mussar en la votaziun la fin da november cura ch'il referendum cunter la lescha da Covid vegn avant il pievel.



Andreas Glaser: «La democrazia è meglra che mintga furma da la dictatura.»

FOTO FRANK BRÜDERLI

Il professor da dretg e directur dal Center per democrazia ad Aarau

Andreas Glaser (44) è professor ordinari per dretg public, dretg administrativ e dretg europeic a l'Universitad da Turgovia. Entaifer quest pensum è el incumbensà per dumondas da la democrazia. Dapi 2017 è Andreas Glaser er directur dal Center per democrazia ad Aarau, ina instituziun che fa perscrutaziuns da basa e sa fatschenta cun dumondas actualas da la democrazia. Gia da sia giuventetgna ennà ha Andreas Glaser ina relaziun speziala cun il Grischun rumantsch. El ha emprendì rumantsch entras sias dimoras da vacanzas a Sagogn. (fmr/mg)

«Privlus per la democrazia è ina radicalisaziun, surtut en las medias socialas, ubain er smanatschas vers politicras e politichers.»

Andreas Glaser,
directur dal Center per democrazia
ad Aarau

Quant fitg po la democrazia svizra vertir quella situaziun pesanta che nus avain il mument?

Jau less dir, che la democrazia sco tala n'ha survegnì nagins donns. La democrazia funcziuna bain, referendum ed iniziativas vegnan lantschads. La participaziun a votaziuns è perfin creschida il davos temp. Nus na vulain betg emblidar ch'il Grischun ha gist uss introduci in nov sistem electoral per il parlament. Problematic ma paran dentant ils svilups en las cundiziuns da rom. E privlus per la democrazia è ina radicalisaziun, surtut en las medias socialas, ubain er smanatschas vers politicras e politichers. Sch'i na

reussescha betg da dumagnar talas tendenzas, pudess quai infectar in bel di la democrazia sco tala. Ins dastga dentant er dir, ch'igl ha adina puspè dà er tar nus periodas cun conflicts politics.

La libertad d'exprimer l'opiniun è impurtanta en nosa democrazia, surtut er uss en questa crisa. Quant legitim èsi che las autoritads chantunalas u communalas tolereschan per exempel demonstraziuns betg lubidas? Nua è il cunfin da toleranza en noss sistem?

In cunfin absolut è tenor la giurisprudenza las demonstraziuns violentas. Sch'i dat acts da violenza cunter chaussas u schizunt cunter umans, lura ston demonstraziuns vegnir scumandadas u schliadas si cun forza. Sch'ina demonstraziun n'è «mo» betg lubida, lura èsi tenor la proporzionalitad legitim che las autoritads tolereschan quella demonstraziun enfin tar in tschert punct, natiralmain presupponì ch'ella restia paschaivla.

Er ina democrazia directa sco en Svizra è vulnerabla – quai ha il davos onn e mez mussà. Tge consequenzas stuain nus trair or da questa crisa?

Las instituziuns sco talas èn sa cumprovadas en il temp da crisa. Ins sto dentant forsa tgirar dapli las cundiziuns da basa da la democrazia, surtut era da la democrazia directa. Co pon ins segirar il dialog u discurs democratic equilibrà? Tge rolla gogan las medias, surtut l'internet? Dovri plitost mesiras socialas? U datti in basegn per novas regulaziuns da la sfera sociala? È la comunicaziun da las autoritads politicas vairamain anc chapibla per ils vasts circuls da la populaziun? Ina consequenza pon ins dentant malgrà tut la critica gia oz confermar: La democrazia è meglra che mintga furma da la dictatura.